



Broj: IP-03-47-5-07382/12VT
Banja Luka, 13.8.2012. godine

Institut za intelektualno vlasništvo Bosne i Hercegovine (u daljem tekstu: Institut), na osnovu člana 11. a u vezi sa članom 44. Zakona o kolektivnom ostvarivanju autorskog i srodnih prava („Službeni glasnik BiH“ broj 63/10), čl. 114. i 193. stav (1) Zakona o upravnom postupku („Službeni glasnik BiH“ br. 29/02, 12/04, 88/07 i 93/09), postupajući po službenoj dužnosti, d o n o s i

R J E Š E N J E **o oduzimanju dozvole za ostvarivanje prava proizvođača fonograma**

1. **ODUZIMA SE dozvola** Udruženju za zaštitu diskografskih izdanja „Kvantum“ Bijeljina, Ulica Loznička broj 5, koju je izdao Institut za standarde, mjeriteljstvo i intelektualno vlasništvo Bosne i Hercegovine Rješenjem broj IP-5333/05-04 VL od 10.10.2005. godine, **za obavljanje djelatnosti ostvarivanja prava proizvođača fonograma.**
2. Dozvola za obavljanje djelatnosti ostvarivanja prava proizvođača fonograma oduzima se sa danom **11.8.2012. godine.**
3. Udruženje za zaštitu diskografskih izdanja „Kvantum“ Bijeljina dužno je da dostavi Institutu izvještaj o poslovanju, raspodjeli i utrošku sredstava zaključno sa danom važenja dozvole, u zakonskom roku.
4. Udruženje za zaštitu diskografskih izdanja „Kvantum“ Bijeljina dužno je da organizaciji koja dobije dozvolu za kolektivno ostvarivanje prava proizvođača fonograma ustupi svu relevantnu dokumentaciju neophodnu za obavljanje ove djelatnosti u roku od 30 dana od dana izdavanja dozvole.
5. Ovo rješenje objaviti u „Službenom glasniku BiH“ i u „Službenom glasniku Instituta“.

Obrazloženje

Institut za standarde, mjeriteljstvo i intelektualno vlasništvo Bosne i Hercegovine, pravni prethodnik Instituta za intelektualno vlasništvo Bosne i Hercegovine, Rješenjem broj IP-5333/05-04 VL od 10.10.2005. godine izdao je Udruženju za zaštitu diskografskih izdanja „Kvantum“ Bijeljina odobrenje za obavljanje djelatnosti ostvarivanja prava proizvođača fonograma.

Zakonom o kolektivnom ostvarivanju autorskog i srodnih prava („Službeni glasnik BiH“ broj 63/10), koji je stupio na snagu 11.8.2010. godine, dozvoljen je nastavak rada postojećim kolektivnim organizacijama pod uvjetima utvrđenim članom 44. Naime, navedenim članom u stavu (1) Zakona propisano je da organizacije autora i drugih nosilaca autorskih prava, te druga pravna lica specijalizirana za ostvarivanje autorskih prava koja su, prema odredbi člana 87. Zakona o autorskom pravu i srodnim pravima u BiH („Službeni glasnik BiH“ br. 7/02 i 76/06), obavljala poslove kolektivnog ostvarivanja autorskog prava prije stupanja na snagu ovog zakona nastavljaju da rade i poslije stupanja na snagu ovog zakona. Stavom (2) istog člana predviđeno je da su svi subjekti iz prethodnog stava dužni da usklade svoj statusni oblik i svoje poslovanje sa odredbama novog zakona i podnesu zahtjev za izdavanje nove dozvole za obavljanje poslova kolektivnog ostvarivanja autorskog i srodnih prava u roku od dvije godine od stupanja na snagu ovog zakona.

Poslovanje Udruženja za zaštitu diskografskih izdanja „Kvantum“ Bijeljina bilo je predmet analize u okviru Izvještaja o funkcioniranju sistema kolektivnog ostvarivanja autorskog i srodnih prava u Bosni i Hercegovini za period od 2005. do 2010. godine, koji je usvojila Parlamentarna skupština Bosne i Hercegovine, na sjednici Predstavničkog doma održanoj 19.4.2012. godine i sjednici Doma naroda održanoj 15.5.2012. godine. U Izvještaju je konstatirano da Udruženje nije poslovalo u skladu sa unutrašnjim aktima kojima je uređena organizacija Udruženja, da nije ostvarivalo ciljeve za koje je osnovano, odnosno da nije uopće poslovalo tri godine, da je u 2010. godini cjelokupan prihod Udruženja utrošen za redovne troškove poslovanja ovog udruženja, da nije raspodijeljen nosiocima prava, čime je prekršen osnovni smisao kolektivnog ostvarivanja autorskog i srodnih prava, i da dosadašnji način poslovanja „Kvantuma“ ne zadovoljava standarde u pogledu transparentnosti i demokratičnosti rada organizacije, načina tarifiranja naknada, raspodjele prihoda i efikasnosti ostvarivanja cilja postojanja reguliranog zakonom.

Udruženje za zaštitu diskografskih izdanja „Kvantum“ Bijeljina podnijelo je zahtjev za izdavanje dozvole za obavljanje poslova kolektivnog ostvarivanja prava proizvođača fonograma, odnosno za obnovu dozvole, koji je zaprimljen u Institutu 19.7.2012. godine pod brojem IP-03-47-5-07694/12. Članom 208. Zakona o upravnom postupku predviđeno je da u slučajevima kada se postupak pokreće po zahtjevu stranke, a prije donošenja rješenja potrebno je provesti poseban ispitni postupak, nadležni organ je dužan da donese rješenje najkasnije u roku od 60 dana. Zakonom o kolektivnom ostvarivanju autorskog i srodnih prava („Službeni glasnik BiH“ broj 63/10) u čl. 10. stav (3) i 47. utvrđena je obaveza Instituta za intelektualno vlasništvo BiH da donese propise za provođenje postupka za davanje dozvole za kolektivno ostvarivanje autorskog i srodnih prava. Način i forma ispunjavanja uvjeta za davanje dozvole pravnim licima za obavljanje poslova kolektivnog ostvarivanja autorskog i srodnih prava uređeni su Pravilnikom o načinu i formi ispunjavanja uvjeta za davanje dozvole pravnim licima za obavljanje poslova kolektivnog ostvarivanja autorskog i srodnih prava („Službeni glasnik BiH“ broj 44/11). Članom 18. Pravilnika o načinu i formi ispunjavanja uvjeta za davanje dozvole pravnim licima za obavljanje poslova kolektivnog ostvarivanja autorskog i srodnih prava predviđeno je da će Institut na osnovu primljenog pisanog zahtjeva provesti postupak za izdavanje dozvole najkasnije u roku od šest mjeseci. Ako podaci i dokumentacija nisu potpuni, rok počinje da teče kada pravno lice, u skladu sa pozivom Instituta, uredi zahtjev. Dalje, ako Institut odluči da pribavi mišljenje Vijeća za autorsko pravo i srodna prava ili nezavisnih stručnjaka, odnosno stručnih institucija ili organizacija, tada rok za odlučivanje Instituta iznosi 30 dana od dana prijema stručnog mišljenja.

Imajući u vidu da se radi o složenom upravnom predmetu, da je zahtjev za izdavanje dozvole podnesen 19.7.2012. godine, da važeća dozvola ističe 11.8.2012. godine, a uzimajući u obzir navedene rokove za donošenje rješenja, evidentno je da je zahtjev podnesen u neprimjereno kratkom roku, te da nije mogao biti procesuiran do datuma isteka dozvole.

Nesporno je da je Udruženje „Kvantum“ dužno da izvrši isplate prikupljenih sredstava svim nosiocima čija prava je ostvarivalo za period do kojeg je imalo važeću dozvolu, te da je dužno sve relevantne podatke i dokumentaciju koji su neophodni za obavljanje poslova ustupiti novoj kolektivnoj organizaciji koja će ostvarivati ova prava.

Prema članu 13. stav (4) Zakona o kolektivnom ostvarivanju autorskog i srodnih prava, obavještenje o odluci o oduzimanju dozvole objavljuje se u „Službenom glasniku BiH“ i u „Službenom glasniku Instituta“, te je odlučeno kao u tački 5. ovog rješenja.

Pouka o pravnom lijeku: Ovo rješenje je konačno u upravnom postupku. Protiv ovog rješenja može da se pokrene upravni spor podnošenjem tužbe Sudu Bosne i Hercegovine u roku od 60 dana od dana prijema rješenja.

Direktorica
Instituta za intelektualno vlasništvo
Bosne i Hercegovine
Lidija Vignjević